

欽定大清會典事例

欽定大清會典事例卷三十

吏部

官制 各省知縣等官二

國初定每縣設知縣一人。典史一人。縣丞主簿因  
事增減無定員。倉庫稅課司大使副使。巡檢驛  
丞所官皆因事設立無定員。○順治三年。江南  
設江甯上元二縣知縣。縣丞主簿。典史等官。並  
裁各省縣主簿缺。○八年。直隸復設香河玉田  
二縣。縣丞各一人。陽樊驛驛丞一人。江南設吳  
縣長洲嘉定崑山常熟吳江華亭上海青浦武

進宜興無錫江陰等縣主簿。浙江設嘉興秀水  
海鹽崇德嘉善桐鄉平湖歸安烏程德清長興  
等縣主簿各一人。○九年。山西裁大同縣縣丞  
雲中驛驛丞各一人。○十年。改遼陽為府。置附  
郭遼陽縣。改海州為海城縣。各設知縣典史等  
官。○十二年。四川裁南部縣縣丞。陝西裁雒南  
縣縣丞各一人。○十三年。析江南華亭縣地置  
婁縣。隸松江府。設知縣典史等官。○又陝西裁  
狄道縣縣丞一人。裁同官縣金鎖關清水縣盤  
嶺關禮縣板橋山巡檢各一人。裁和政驛長甯

驛驛丞各一人。十四年廣東裁東莞白沙三水樂昌英德始興恩平鎮平海豐等縣巡檢各一人。十五年陝甘裁膚施中部郿三縣縣丞各一人。裁鉛川青陽等驛驛丞各一人。裁牛尾莊界河口孟家峪馬關關張村岔靈石口平渡關秦嶺武關柴家關十八盤富水堡豐陽關竹竹關等處巡檢各一人。裁馬站水泉倉副使一人。裁咸陽縣遞運所靈臺縣遞運所蘭泉遞運所大使各一人。裁驛馬關靈祐驛靈武驛驛丞各一人。十六年省直隸水甯縣入延慶州省

阜平縣入曲陽行唐二縣省。灤縣入通州省。興濟縣入青縣省。四川彭明縣入綿州省。河南南召縣入南陽縣。裁知縣等官。各設巡檢一人。○又直隸裁密雲遵化涑水三縣縣丞各一人。○十八年改貴州馬乃土司置普安縣。設知縣典史等官。○康熙元年改奉天錦州為錦縣。隸奉天府。設知縣典史等官。甯遠縣事暫歸錦縣管。理。○又改浙江崇德縣為石門縣。○又省四川雙流縣入新津縣省。璧山縣入永川縣省。大足縣入榮昌縣省。安居銅梁定遠三縣入合州省。

安岳縣入遼甯縣各裁知縣典史等官。○二年諭奉天府內著設一縣山海關以外開原以內應添設府州縣酌議以聞。欽此。遵

旨議定奉天置承德縣為府治設京縣知縣一人典史一人巨流河巡檢一人置開原鐵嶺二縣設知縣典史等官改遼陽縣為州裁知縣等官改廣甯為府置廣甯縣為府治設知縣典史等官。○三年改奉天所屬錦縣置錦州府以錦縣為府治改廣甯府為縣隸錦州府設知縣典史等官。○五年省廣東新安縣入東莞縣省澄海縣入

海陽縣。裁知縣等官。又裁海豐、饒平、吳川、靈山、澄邁、文昌、臨高、七縣縣丞各一人。○又改廣西上林長官司為西林縣。隸思南府。設知縣等官。○六年。省四川威遠縣入榮縣。裁知縣等官。○七年。省四川崇甯縣入邛縣。省彭縣入新繁縣。省岳池縣入廣安州。省新甯縣入梁山縣。省大甯縣入奉節縣。省武隆縣入涪州。又省貴州清平縣入麻哈州。裁知縣等官。○八年。廣東復置新安縣。隸廣州府。復置澄海縣。隸潮州府。各設知縣。典史等官。○九年。省四川華陽縣入成都。

縣省大昌縣入巫山縣。裁知縣等官。○又江南設清河宿遷歸仁隄三處主簿各一人。○十年改貴州龍里衛置龍里縣。隸貴陽府。改都勻衛置都勻縣。隸都勻府。為府治。改普定衛置普定縣。隸安順府。為府治。改平越衛置平越縣。隸平越府。為府治。各設知縣典史等官。○十一年貴州復置清平縣。隸都勻府。設知縣等官。○十五年升直隸遵化縣為州。裁知縣等官。○二十二年直隸復置阜平縣。隸正定府。設知縣典史等官。○又江南設睢甯縣。安東縣。管河縣丞各一



人山陽縣外河縣丞一人。裁高家堰大使。改設主簿一人。二十三年。福建置臺灣鳳山。諸羅三縣隸臺灣府。各設知縣。典史等官。二十四年。析廣東南海番禺二縣地置花縣。隸廣州府。設知縣。典史等官。二十五年。陝西裁三岔西津摩雲等驛驛丞各一人。二十六年。浙江置定海縣。改舊設之定海為鎮海縣。各設知縣。典史等官。又改四川永甯衛置永甯縣。屬敘水廳。設知縣。典史等官。改貴州貴前二衛置貴筑新貴二縣。隸貴陽府為府治。改敷勇衛修文所。

灌靈所息烽所于襄所置修文縣改威清鎮西  
二衛林聲威武二所置清鎮縣改平埔衛柔遠  
所置安平縣改安南衛置安南縣改畢節赤水  
二衛置畢節縣各設知縣典史等官○二十九  
年直隸裁密雲驛丞改設密雲縣石匣縣丞一  
人○三十二年改直隸宣府鎮為宣化府置宣  
化縣為府治改上北路置赤城縣改下北路置  
龍門縣改西路置萬全縣改東路置懷來縣改  
懷安衛置懷安縣改蔚州衛置西甯縣均隸宣  
化府各設知縣典史等官並添設縣丞二人驛

丞七人。○又改雲南平彝衛置平彝縣。隸曲靖府。設知縣典史等官。○三十三年陝西設大澗壩沙圪堆二驛。驛丞各一人。改蘭泉驛。驛丞管理蘆塘松山二驛事務。○三十四年省貴州新貴縣入貴筑縣。裁知縣等官。○三十七年直隸添設河工縣丞三人。主簿四人。○四十七年浙江裁蘭谿縣澱水驛。驛丞一人。歸併蘭谿縣管。○五十八年湖南裁偏沅所屬湘陰等營田巡檢八人。○六十年析四川合州地復置銅梁縣。隸重慶府。析廣安州地復置岳池縣。隸順慶府。

各設知縣典史等官。成都府屬之德陽灌縣安  
縣什邡綿竹五縣。潼川府屬之安岳縣各設典  
史一人。○雍正元年。析福建臺灣府諸羅縣北  
平錢地方。置彰化縣。仍隸臺灣府。設知縣典史  
等官。○又改直隸深州所置甯河縣。設知縣典  
史等官。改真定縣為正定縣。改江蘇儀真縣為  
儀徵縣。○二年。改直隸正定府屬之南宮新河  
真定武邑衡水五縣。隸冀州。直隸州。柏鄉隆平  
高邑臨城甯晉五縣。隸趙州。直隸州。武強鏡陽  
安平三縣。隸深州。直隸州。無極景城二縣。隸晉

州直隸州。曲陽、新樂二縣隸定州直隸州。○又  
改山東濟南府屬之新泰、萊蕪、長清三縣隸泰  
安直隸州。陽信、海豐、樂陵三縣隸武定直隸州。  
利津、霑化、蒲臺三縣隸濱州直隸州。兗州府屬  
之曹縣、定陶二縣隸曹州直隸州。郟城、費縣二  
縣隸沂州直隸州。嘉祥、鉅野、鄆城三縣隸濟甯  
直隸州。○又改山西平陽府屬之臨晉、榮河、萬  
泉、猗氏四縣隸蒲州直隸州。安邑、夏縣、平陸、芮  
城、垣曲、五縣隸解州直隸州。太平、襄陵、稷山、河  
津、四縣隸絳州直隸州。蒲縣、鄉寧二縣隸吉州。

直隸州大甯汾西水河三縣隸隰州直隸州太原府屬之樂平孟縣壽陽三縣隸平定直隸州定襄靜樂二縣隸忻州直隸州五臺繁峙崞縣三縣隸代州直隸州河曲興縣二縣隸保德直隸州○又改河南開封府屬之西華高水項城沈邱四縣隸陳州直隸州臨潁襄城郟城長葛四縣隸許州直隸州密縣新鄭二縣隸禹州直隸州滎陽滎澤河津河陰汜水五縣隸鄭州直隸州其原武延津二縣均在河北將原武縣歸懷慶府管轄延津縣歸衛輝府管轄河南府屬

之靈寶閭鄉二縣隸陝州直隸州汝甯府屬之  
光山息縣固始商城四縣隸光州直隸州○又  
析江南蘇州府屬長洲縣地置元和縣析吳江  
縣地置震澤縣析常熟縣地置昭文縣析崑山  
縣地置新陽縣仍隸蘇州府析嘉定縣地置寶  
山縣析太倉州地置鎮洋縣仍隸太倉直隸州  
析松江府屬華亭縣地置奉賢縣析婁縣地置  
金山縣析青浦縣地置福泉縣析上海縣地置  
南匯縣仍隸松江府析常州府屬武進縣地置  
陽湖縣析無錫縣地置金匱縣析宜興縣地置

荆溪縣仍隸常州府。各設知縣典史等官。其長洲、吳江、崑山、華亭、婁縣、青浦、上海七縣舊設縣丞各二人俱裁去一人。○又改江南鳳陽府屬之潁上、霍邱二縣隸潁州直隸州。太和、蒙城二縣隸亳州直隸州。盱眙、天長、五河三縣隸泗州直隸州。改廬州府屬之英山、霍山二縣隸六安直隸州。改蘇州府屬之嘉定、崇明二縣隸太倉直隸州。改淮安府屬之宿遷、睢甯二縣隸邳州直隸州。贛榆、沭陽二縣隸海州直隸州。○又改江南揚州府屬之如皋、泰興二縣隸通州直隸



州。○又改甘肅甯夏衛置甯夏府。以所屬左衛置甯夏縣。以右衛置甯朔縣。並為府治。改中衛置中衛縣。改平羅所置平羅縣。俱隸甯夏府。改西甯廳置西甯府。以地置西甯縣為府治。改碾伯所置碾伯縣。隸西甯府。改涼州廳置涼州府。以所屬衛地置武威縣為府治。改鎮番衛置鎮番縣。改永昌衛置永昌縣。改古浪廳置古浪縣。改莊浪廳置平番縣。俱隸涼州府。改甘州廳置甘州府。以所屬左右兩衛置張掖縣為府治。改山丹衛置山丹縣。改高臺廳置高臺縣。俱隸甘

州府各設知縣典史等官。張掖縣設縣丞一人。  
○又改河南真陽縣為正陽縣。○又改廣東廣  
州府屬之陽山縣隸連州直隸州。○又陝西葭  
成縣黃渚關巡檢一人。○三年改直隸山海衛  
置臨榆縣隸永平府。設知縣典史等官。○又山  
西置朔平甯武二府。改右玉衛置右玉縣。改左  
雲衛置左雲縣。改平魯衛置平魯縣。並撥大同  
府屬之馬邑縣俱隸朔平府。改甯武所置甯武  
縣。改神池堡置神池縣。改偏關所置偏關縣。改  
五寨堡置五寨縣。俱隸甯武府。改天鎮衛置天

鎮縣改陽高衛置陽高縣俱隸大同府改甯化  
所為巡檢司隸甯武縣右玉等九縣各設知縣  
典史等官甯武縣添設巡檢一人○又改直隸  
大名府屬濬滑二縣隸河南衛輝府內黃縣隸  
河南彰德府○又改陝西西安府屬之鎮安雒  
陽山陽商南四縣隸商州直隸州朝邑郃陽澄  
城韓城四縣隸同州直隸州華陰蒲城二縣隸  
華州直隸州武功永壽三縣隸乾州直隸州三  
水瀘化長武三縣隸邠州直隸州同官白水二  
縣隸耀州直隸州改延安府屬之洛川中部宜

君三縣。隸鄜州直隸州。吳堡。神木。府谷。三縣。隸葭州直隸州。米脂。清澗。二縣。隸綏德直隸州。○又改江西進賢縣巡檢一人。駐甯州。改新建縣巡檢。駐武甯。裁玉山縣懷玉驛。驛丞。改設巡檢一人。○又江南裁縣丞一人。巡檢四人。驛丞四人。江西裁縣丞一人。巡檢三人。驛丞十三人。浙江裁縣丞一人。巡檢二人。驛丞一人。湖南裁巡檢二人。山東裁巡檢一人。山西裁縣丞十八人。巡檢一人。驛丞三人。廣東裁巡檢一人。驛丞三人。河泊所所官一人。廣西裁巡檢二人。○四年

論朕非覽湖廣安陸府屬有一縣名卽係

景陵二字。見之心甚不安。此縣名著內閣擬改請旨。欽

此。尋經內閣撰擬具奏。奉

旨。著改為天門縣。○又直隸設宛平良鄉固安水清東

安武清六縣河工縣丞主簿各一人。屬永定河

道管轄。設安兒渡縣丞東楊村主簿玉田縣縣

丞豐潤縣主簿各一人。屬通水道管轄。○又山

西設老營堡雁門所巡檢各一人。○又改湖南

靖州屬之天柱縣隸貴州黎平府。○五年改貴

州五開衛置開泰縣。改銅鼓衛置錦屏縣。隸黎

平府改平溪衛置玉屏縣改清浪衛置清溪縣  
隸思州府各設知縣典史等官○又四川復置  
華陽縣隸成都府與成都縣並為府治設知縣  
典史等官改資縣為直隸州裁知縣典史等官  
以成都府屬之仁壽資陽井研內江四縣隸資  
州直隸州成都府屬之德陽安縣綿竹三縣保  
甯府屬之梓潼縣隸綿州直隸州成都府屬之  
汶川保縣三縣隸茂州直隸州以原隸馬湖府  
之屏山縣隸敘州府○又議准河南開封府南  
岸祥符縣隄長八十餘里舊設縣丞一人添設

主簿一人。下北河地方。舊設主簿一人。添設巡檢二人。○又改貴州威甯府屬之永甯縣。隸四川省。歸敘永同知管轄。○又以雲南東川府巧家營地方。置會澤縣。隸東川府。設知縣。典史等官。其互補地方。距府百里。則補地方。遠在江外。各設巡檢一人。○又改貴州南籠廳為府。以安順府所屬安南。普安二縣隸之。○又改廣東廣州府屬之連山縣。隸連州直隸州。○又改河南南召縣。雅路鎮巡檢。移紮李清店。武陟縣主簿。移紮木樂店。○又陝西裁兆陽驛。武威驛。永昌

驛古浪驛南大通驛西甯驛嘉順驛巴古驛王  
鎡大壩驛等處驛丞九人。○又湖南裁衡陽縣  
松柏市巡檢一人。○又湖北設漢陽縣漢口鎮  
巡檢一人。○又省河南胙城縣入延津縣。裁知  
縣典史等官。○六年改四川建昌衛置甯遠府。  
以衛地置西昌縣為府治。改甯番衛置冕甯縣。  
改鹽井置鹽源縣。各設知縣典史等官。○又以  
雲南烏蒙府屬米貼地方。置永善縣。隸烏蒙府。  
設知縣典史等官。○又升山西蒲州為府。以州  
地置永濟縣為府治。升澤州為府。以州地置鳳



臺縣為府治。各設知縣與史等官。○又以陝甘  
插漢控輝地方。置寶豐縣。設知縣與史等官。○  
又改湖北施州大田。二衛置恩施縣。隸歸州直  
隸州。設知縣與史等官。並改荊州府屬巴東與  
山。長陽三縣隸之。○又改陝西徽州為徽縣。隸  
秦州直隸州。設知縣與史等官。○又直隸裁蔚  
縣。廣昌巡檢一人。其所轄廣德里。歸併廣昌縣。  
仍隸山西大同府。○又江南蘇州松江所屬設  
吳淞。天妃。七浦。三牘。牘官各一人。白茆。徐六。浮  
二牘。牘官各一人。○又安徽裁南陵縣。義履司。

巡檢一人。江西裁樂安縣縣丞一人。○又湖南

設湘潭縣城外巡檢一人。雲南設恩樂縣典史

一人。○又四川復置雙流縣彭縣郫縣隸成都

府。復置大足定遠璧山三縣隸重慶府。復置彰

明隸隸錦州直隸州各設知縣等官。○七年改

雲南會澤縣為東川府附郭首縣。○又改湖南

永順保靖桑植三土司置永順府改永順宣慰

司置永順縣為府治。改白崖洞長官司置龍山

縣改保靖宣慰司置保靖縣改桑植安撫司置

桑植縣各設知縣典史等官。隸永順府設田家

尚施洛州隆頭張家壩巡檢各一人。裁大喇司  
巡檢一人。○又析山西臨晉縣之虞鄉鎮地方。  
置虞鄉縣。隸蒲州府。分治河工。設知縣。與史等  
官。○又改湖南九谿水定二衛。置安福縣。隸澧  
州直隸州。設知縣。與史。九谿衛巡檢各一人。並  
改岳州府屬之安鄉石門慈利三縣。隸之。○又  
雲南增置開化府文山縣。設知縣一人。○又升  
四川雅州為府。以州地置雅安縣為府治。以原  
轄之名山榮經蘆山等縣隸之。復置文甯縣。隸  
夔州府。復置安岳縣。隸潼川直隸州。復置威遠

縣隸嘉定直隸州各設知縣典史等官。○又改甘肅甘州府之高臺縣隸肅州直隸州。○又以四川黎大所地方置清溪縣設知縣一人再設典史一人分駐泥頭隸雅州府。○又改山西絳州屬之襄陵太平三縣隸平陽府解州屬之垣曲縣平陽府屬之絳縣聞喜二縣隸絳州直隸州改湖北黃州府屬之黃陂縣德安府屬之孝感縣隸漢陽府改廣西賓州屬之武宣縣隸潯州府西隆州屬之西甯縣隸泗城府改江西南康府屬之長嶺巡檢駐青山改左蠡巡檢駐渚

漢改永豐縣柘陽寨巡檢駐洋口。改湖南湘潭縣縣丞駐朱亭市。改岳陽驛驛丞駐橋頭鋪。改廣西宜山縣縣丞駐楞村。改雲南永善縣典史駐烏蒙井底沅。又省奉天秦甯縣裁知縣典史等官。又廣東裁海豐縣南豐平安二驛驛丞各一人。改設巡檢二人。分駐河田汕尾地方。裁東海害驛丞。改設巡檢一人。又甘肅裁涼州府平番縣西大通驛驛丞。添設縣丞一人。兼管驛務。改沙井驛隸蘭州管轄。陝西裁延長縣千谷驛。延川縣文安驛清澗縣石背驛吳堡縣

河西驛驛丞各一人。裁潼關縣遞運所大使一人。長武縣傳口遞運所大使一人。○又湖南裁黃堡等五驛驛丞各一人。歸各該縣管理。河南裁陝州甘棠驛驛丞。缺添設硤石驛驛丞一人。山東裁濟南府屬之譚城安德昌平太平魚邱徃山。六驛驛丞各一人。廣西裁南甯府屬宣化縣那龍寨巡檢。改設三官堡巡檢一人。○又山西設右玉縣之殺虎口。威遠堡巡檢各一人。左雲縣之高山城。助馬口巡檢各一人。平魯縣并坪城巡檢一人。移沁水縣東塢嶺巡檢。駐端氏。

鎮設汾陽縣黃盧嶺巡檢一人移原駐運城之  
安邑縣典史駐縣城添設運城巡檢一人○又  
廣東設惠來縣蔡潭鄉巡檢一人○八年改甘  
肅鞏昌府屬之靖遠廳為靖遠縣設知縣典史  
等官○又改甘肅榆林衛置榆林府以衛地置  
榆林縣為府治改靖邊所置靖邊縣改定邊協  
鎮置定邊縣改懷遠堡置懷遠縣俱隸榆林府  
各設知縣典史等官○又改山西保德州屬之  
興縣仍隸太原府改陝西臨潼縣丞駐關山  
鎮改潼關廳大慶關巡檢隸朝邑縣○又改江

南江甯府屬之溧陽縣隸鎮江府。改安徽望江縣楊灣河巡檢駐華陽。改定遠縣主簿駐北鑪橋。改浙江定海縣涇港司巡檢駐岱山。改鄞縣四明驛丞駐江干。添設定海縣沈家澳巡檢一人。改福建福清縣丞駐平潭。改廣東定海縣青甯司巡檢駐太平汛。添設瓊山縣水尾司巡檢一人。改番禺縣縣丞駐南村。添設香山縣縣丞一人。駐前山寨城。改湖南田家峒巡檢駐榔溪。改張家壩巡檢駐里耶。○又山西裁陽曲縣臨汾驛。徐溝縣同戈驛。祁縣賈令驛。臨汾縣



建雄驛洪洞縣普潤驛靈石縣瑞石驛聞喜縣  
涑川驛長子縣漳潭驛屯留縣余吾驛平遙縣  
洪善驛介休縣義棠驛鳳臺縣太行驛永濟縣  
河東驛臨晉縣樊橋驛大同縣寶城驛驛丞各  
一人其驛務歸各該縣管理○又江南裁臨淮  
縣濠梁驛江浦縣江淮驛六合縣堂邑驛丹徒  
縣京口驛江都縣廣陵驛儀徵縣水驛寶應縣  
安平驛山陽縣淮陰驛清河縣清口驛宿遷縣  
鍾吾驛驛丞各一人其驛務歸各該縣管理復  
設潛山縣青口驛太湖縣小池驛驛丞各一人

添設南陵縣公館驛桃源縣古城驛驛丞各一人。○又福建裁南靖縣平南驛龍巖縣適中驛南平縣五臺驛將樂縣白蓮驛崇安縣興田驛驛丞各一人。其驛務歸各該縣縣丞巡檢等員管理。○又湖北裁荆山荆南孫黃漢江鄖城五驛驛丞各一人。其驛務歸各該縣管理。○又廣東裁武甯大陵二驛驛丞各一人。其驛務歸各該縣管理。改欣樂平山平政蘇州四驛驛丞缺俱為巡檢。○又直隸設邢臺縣西黃村巡檢一人。改行唐縣兩嶺口巡檢。駐上碑村。設河南太

康縣縣丞一人。祥符縣朱仙鎮巡檢一人。○又  
甘肅設張掖縣驛丞一人。駐沙河。兼管沙河。撫  
彝二驛。高臺縣驛丞一人。駐鹽池。兼管鹽池。雙  
井二驛。改涼州平城驛。兼管之。通遠縣驛務歸  
平番縣管理。○又四川設成都華陽。巴縣。墊江。  
渠縣。大竹。宜賓。富順。隆昌。永甯。奉節。梁山。萬縣。  
平武。西昌。榮縣。遂寧。德陽。保縣。十九縣縣丞各  
一人。富順。南溪。綿竹。三縣主簿各一人。建始。保  
縣。汶川。三縣典史各一人。灌縣之白沙河。新都  
之彌牟鎮。巴縣之木洞鎮。銅梁之安居縣。治南

充之東觀場岳池之黎梓衛南部之西河口廣  
元之百丈關朝天鎮昭化之白水通江之椽壩  
關宜賓之橫江宣化驛屏山之石角營萬縣之  
市郭里雲陽之雲安廠平武之中壩場犍為之  
牛花溪射洪之大庾渡蓬溪之蓬萊鎮巡檢各  
一人。裁太平明通巡檢一人。○又廣東設朝陽  
縣縣丞一人。吳川縣碭洲巡檢一人。○又雲南  
設文山縣典史一人。○九年。升直隸天津直隸  
州為府。以州地置天津縣為府治。設知縣典史  
等官。以原轄之青縣靜海二縣隸之。並改河間

府屬之南皮鹽山慶雲三縣均隸天津府。○又議准江南改設河官。設山陽縣童營司巡檢一人。○又移福建臺灣縣縣丞駐羅漢門鳳山縣萬丹地方。添設縣丞一人。管轄淡水枋寮口等處。移原設淡水巡檢駐大崑麓。諸羅縣笨港地方。添設縣丞一人。移原設之佳里興巡檢駐鹽水港。○又以江西吉安廣信二府屬皆有永豐一縣。改廣信府屬永豐縣為廣豐縣。○又析廣東海豐縣之甲子捷勝二所置陸豐縣。隸惠州府。設知縣。典史各一人。甲子巡檢一人。改河田

巡檢隸陸豐縣。裁平海大城海安大鵬雙魚五所。設平海所巡檢一人。並添設新安陽江二縣縣丞各一人。駐大鵬雙魚二所城。裁陽江縣太平驛。陽春縣樂安驛。縣丞二人。其驛務各歸該縣管理。於太平地方添設巡檢一人。○又析廣東新會開平二縣連界之大官田地方。置鶴山縣。隸肇慶府。設知縣典史等官。改新會縣藥徑司巡檢。隸鶴山縣。○又析江蘇山陽縣地。置阜甯縣。以廟灣鎮為縣治。仍隸淮安府。設知縣典史等官。縣丞一人。管理河務。改原設廟灣巡檢。

駐草堰口。改鹽城縣清溝司巡檢。駐上岡。析江都縣地置甘泉縣。仍隸揚州府。設知縣典史等官。以瓜洲萬壽二巡司並廣陵驛隸江都縣。以邵伯上官二巡司隸甘泉縣。改江都縣主簿為甘泉縣主簿。添設如皋縣主簿一人。駐掘港。○又改山西吉州屬之蒲縣隸隰州。隰州屬之汾西縣隸平陽府。○又改四川綿州屬之彰明縣隸龍安府。○又山西設大同縣縣丞一人。裁神池利民二倉大使各一人。萬德廣盈永甯甯化四倉副使各一人。裁繁峙縣倉大使。改設平刑

關巡檢一人。○又改江蘇嘉定縣江灣司巡檢  
為南翔司巡檢。改江西都昌縣縣丞駐張家嶺  
設瑞昌肇陳口巡檢一人。改廣東南海縣縣丞  
駐十三行。改東安縣羅奇司巡檢。駐西山。為西  
山司巡檢。改湖北應山縣平里巡檢。為平靖關  
巡檢。駐三嶺店。設孝感縣馬漢河巡檢一人。廣  
東葦澄海縣東壘河泊所大使。改設樟林鎮巡  
檢一人。○又奉天設牛莊城倉官一人。廣西設  
懷遠縣梅寨巡檢。宜山縣德勝鎮巡檢各一人。  
○十年。改廣西慶遠府屬之荔波縣。隸貴州都



勻府設都勻府永從開泰夫柱三縣縣丞各一人。又議准江南江都縣芒稻河燠座向歸鹽政動支商捐款項修理今改歸印河官兼管添設燠官一人。又改雲南臨安府屬之新平縣隸元江府改湖北應城縣崎山鎮巡檢駐長江埠移松滋縣紅崖巡檢駐磨盤洲監利縣瓦子灣巡檢駐朱家河改福建龍巖縣縣丞駐漢口雁口司巡檢駐適中驛。又山西設繁峙縣平刑關大同縣聚樂站驛丞各一人廣東設香山縣黃梁都巡檢一人四川設泰甯巡檢一人。

又改湖南辰州府屬之臨武藍山嘉禾三縣隸桂陽直隸州。○十一年升江南徐州為府以州地置銅山縣為府治設知縣典史糧河縣丞各一人以原屬豐沛蕭縣四縣並邳州所屬睢甯宿遷三縣隸之析鳳陽府屬之壽州地置鳳臺縣設知縣典史等官並添設定遠縣池河驛巡檢一人。○又改廣東程鄉縣為嘉應直隸州裁知縣典史等官以惠州府屬興甯長樂二縣湖州府屬平遠鎮平二縣隸之。○又改奉天金州為甯海縣設知縣典史等官裁原設巡檢一人。

○又直隸添設故城縣鄭家口。河間縣景和鎮北魏村。獻縣韓村。南皮縣舊縣鎮。鹽山縣楊二莊。青縣杜林鎮。天津縣葛沽。西沽等處巡檢各一人。吳橋縣連窩驛。交河縣新橋驛。青縣流河驛。乾甯驛。靜海縣奉新驛。天津縣楊青驛。武清縣楊村驛。各驛丞均兼巡檢職銜。河間縣管河縣丞駐張各莊。清河縣管河縣丞駐油房鎮。俱兼巡檢事務。又青縣之長蘆鎮。及歸滄州管轄。南皮縣之舊縣鎮。改歸鹽山縣管轄。易州之黃土臺等村。改歸涿水縣黃村司巡檢兼管。○又

改直隸保定府屬之涿水縣山西大同府屬之  
廣昌縣隸易州直隸州改湖南茶陵州屬之小  
集地方歸攸縣管理設攸縣鳳嶺巡檢一人改  
四川墊江縣新設縣丞駐高灘湯梁山縣新設  
縣丞駐沙河鋪改廣東遂溪縣湛川司巡檢駐  
東海地方移高明縣太平司巡檢駐三洲墟○  
又湖北裁興山縣高雞寨長陽縣寨家園巡檢  
各一人○又四川設冕甯縣縣丞一人駐民尾  
廣東設順德縣縣丞一人駐容鄉廣西設崇善  
縣縣丞一人駐恩城州地方永福縣縣丞一人

駐鹿寨村。湖北設恩施縣巡檢一人。駐忠建鎮。湖南設湘陰縣巡檢一人。駐新市。○又改貴州黎平府屬天柱縣隸鎮遠府。○十二年升福建福甯州為府。以州地置霞浦縣為府治。設知縣與史等官。以原轄之福安甯德並建甯府屬之壽甯縣隸之。析古田縣地置屏南縣隸福州府。設知縣與史等官。改永春龍巖二縣為直隸州。裁知縣等官。以泉州府屬之德化。延平府屬之大田二縣隸永春直隸州。以漳州府屬之漳平甯洋二縣隸龍巖直隸州。○又改福建閩縣縣

丞駐營前改侯官縣丞駐太湖改同安縣丞駐金門改漳浦縣丞駐雲霄改松溪縣丞駐永和里改甯化縣丞駐泉上里改上杭縣丞駐峯市改甯德縣丞駐周墩裁順昌縣仁壽巡檢改設縣丞一人駐其地改侯官縣五縣寨巡檢駐南興改福清縣江口巡檢駐江陰改松溪縣東關司巡檢駐遂應場改甯德縣麻嶺巡檢駐右堂改漳浦縣雲霄巡檢駐盤陀改南安縣大盈驛仙游縣楓亭驛甯化縣石牛驛驛丞俱為巡檢仍兼管驛務添設永春縣黃坂古格地方仙游

縣興秦果巡檢各一人。以漳浦縣南界大嶺後社唐柘林口蔡內蔡等村及銅山續編三堡分隸詔安縣管轄。沙澳鎮坑姑墘岐鳴荷部石埕仙恬浦西等八堡分隸海澄縣管轄。甯化縣永春里歸併安遠寨巡檢管理。○又河南添設南陽縣。汝陽縣縣丞各一人。改靈寶縣縣丞駐號略鎮。閔鄉縣縣丞駐文底鎮。添設滑縣老岸鎮。汝陽縣廟灣鎮。澠池縣硤石驛。固始縣往流集巡檢各一人。湯陰縣宜溝驛。丞。河內縣清化鎮大使均兼巡檢銜。○又升山東武定州為府。

以州地置惠民縣為府治。升沂州為府。以州地置蘭山縣為府治。各設知縣典史等官。以武定原轄之信陽海豐樂陵並濟南府屬之青城商河舊隸濱州之利津霑化蒲臺各縣均隸武定府。以沂州原轄之郟城費縣並舊隸莒州之蒙陰沂水日照各縣均隸沂州府。○又升河南陳州為府。以州地置淮甯縣為府治。升許州為府。以州地置石梁縣為府治。各設知縣典史等官。○又升四川嘉定州為府。以州地置樂山縣為府治。升潼川州為府。以州地置三臺縣為府治。



各設知縣典史等官。以嘉定州原轄之峨眉洪雅夾江犍為榮縣威遠等縣隸嘉定府。以潼川州原轄之射洪鹽亭中江遂甯蓬溪安岳樂至等縣隸潼川府。○又河南復置南陽府南召縣設知縣典史等官。○又析山東青州府屬之益都縣地置博山縣設知縣典史等官。○又改山東大嵩衛置海陽縣改成山衛置榮成縣隸登州府。各設知縣典史等官。改萊陽縣行村鄉巡檢隸海陽縣。改文登縣赤山寨巡檢隸榮成縣。設靖海威海二衛各巡檢一人隸文登縣管轄。

○又改山東麓山一衛雄崖浮山二所歸即墨縣管轄設巡檢一人○又改直隸晉州原轄之無極藁城二縣並定州屬之新樂縣隸正定府改保定府屬之深澤縣隸定州直隸州添設正定府平山縣巡檢一人○又直隸添設蠡縣管河縣丞魏縣管河縣丞武清縣管河縣丞各一人○東鹿縣管河主簿一人○又改江南寶山縣主簿駐高橋上海縣縣丞駐黃家灣華亭縣縣丞駐曹涇管理塘工○又改江南崇明縣大安司巡檢為三角等九沙巡檢改廣西貴縣辛安

寨巡檢為五山汛巡檢駐陸村改平南縣大同鄉巡檢駐大烏墟裁武宣縣安永巡檢一人改原駐武宣縣城巡檢駐縣郭○又改四川重慶府屬之鄧都墊江二縣夔州府屬之梁山縣隸忠州直隸州○又廣東設平遠縣壩頭司西甯縣懷鄉司夜護司陽春縣黃泥灣龍川縣老龍司巡檢各一人改臨高縣博鋪司巡檢駐和合市改歸善縣縣丞駐惠州府城改欣樂司巡檢駐三棟墟改內外二司巡檢駐梁化墟改連州朱岡司巡檢駐東坡觀改惠來縣巡檢駐靖海

○又貴州設清平縣縣丞一人駐凱里銅仁縣  
縣丞一人駐松桃普安縣驛丞一人駐罐子窠  
改善安縣原駐罐子窠典史回駐縣城○十三  
年升湖北彝陵州為宜昌府以州地置東湖縣  
為府治改容美宣撫司所屬五峯司置長樂縣  
隸宜昌府各設知縣典史等官改長陽縣漁陽  
關隸長樂縣設縣丞一人駐紮其地以歸州舊  
隸之長陽興山巴東三縣並隸宜昌府○又升  
陝西同州為府以州地置大荔縣為府治設知  
縣典史等官以原轄之朝邑郃陽韓城三縣暨

原屬華州之華陰蒲城潼關三縣原隸耀州之  
白水一縣隸之。改原屬耀州之同官縣隸西安  
府。○又升安徽潁州為府。以州地置阜陽縣為  
府治。設知縣典史等官。以原轄之潁上霍邱二  
縣並亳州原轄之太和蒙城二縣隸之。○又升  
湖北恩施縣為施南府。以縣地為府治。改恩施  
縣屬之施南土司地置宣恩利川二縣。改散毛  
土司地置來鳳縣。改施州衛土巡司地置咸豐  
縣。均隸施南府。各設知縣典史等官。○又析湖  
南安福縣地置永定縣。隸澧州直隸州。設知縣

典史等官。○又雲南置甯洱縣。隸普洱府為府治。設知縣。典史等官。○又移廣東新甯縣。望高司巡檢。駐廣海寨。○又山西裁浚井。開泥沙澗。平刑。四驛。驛丞各一人。○又升山東泰安州為府。以州地置泰安縣為府治。升曹州為府。以州地置河澤縣為府治。各設知縣。典史等官。以泰安原轄之新泰。萊蕪。並濟南府屬之肥城。舊隸東平州之東阿。平陰。各縣。均隸泰安府。以曹州原轄之曹縣。定陶。鄆城。鉅野。並兗州府屬之單縣。城武。舊隸濮州之范縣。觀城。朝城。各縣。均隸

曹州府

欽定大清會典事例卷三十一

吏部

官制 各省知縣等官三

乾隆元年。升湖南沅州為府。以州地置芷江縣為府治。設知縣縣丞。典史各一人。改辰州府屬黔陽麻陽二縣隸之。○又於雲南廣南府置附郭寶甯縣。設知縣。典史各一人。○又改四川夔州府屬之建始縣隸湖北施南府。○又議准湖南上崗下崗茅岡大刺等處。改土歸流。以上下二崗歸桑植縣管轄。設巡檢一人。大刺地方歸



龍山縣管轄茅岡地方歸永順縣管轄。○又改四川酉陽宣慰司置秀山縣隸酉陽直隸州。設知縣等官。改黔彭廳所屬黔江彭水二縣隸之。○又改陝西榆林府屬之靖邊定邊二縣隸延安府。改舊隸葭州之吳堡縣隸綏德直隸州。○二年。省奉天長甯縣。裁知縣等官。○又議准。順天大興縣所屬慶豐等隘。向設隘官一人。但司啟閉。不能兼顧隄岸。添設大興縣主簿一人。專管河務。○又陝西設府谷縣麻地溝地方巡檢一人。○三年。析福建霞浦縣屬之桐山堡地方。

置福鼎縣。設知縣。典史各一人。○又議准。江南  
運口。原有通濟。福興。清江等牘。今天妃牘。原名  
惠濟牘。其新建正二牘。仍名通濟。正三牘。仍名  
福興。清江。浦之龍旺牘。仍名清江。福興。通濟。二  
牘。各設牘官各一人。舊設之廣濟牘。既經淤閉。  
另築草壩。其原設牘官一人。裁撤。改為通濟牘  
牘官。○又升甘肅蘭州為府。以州地置皋蘭縣。  
為府治。設知縣。典史等官。改臨洮府屬金縣。渭  
源。靖遠等縣隸之。又改狄道縣為州。裁知縣等  
官。○又於廣西泗城府置附郭浚雲縣。鎮安府

置附郭天保縣。設知縣、典史等官。凌雲縣並設縣丞一人。○又廣東設鶴山縣雙橋司巡檢、陽江縣那龍司巡檢、澄邁縣新安司巡檢、鎮平縣羅岡司巡檢各一人。○又廣西設上林縣縣丞一人。○又析廣東海陽縣地置豐順縣。隸潮州府。設知縣、典史等官。○又於河南魯山縣趙家村地方設巡檢一人。○又改湖南寶慶府屬城步縣隸靖州直隸州。○四年移浙江烏程縣後潘巡檢駐南潯鎮。○又江蘇設山陽縣縣丞。主簿各一人。○又陝西裁潼關縣永樂鎮巡檢、潼

開驛驛丞各一人。移風陵司巡檢。駐潼關縣城。  
裁澄城縣縣丞一人。添設大荔縣縣丞。蒲城縣  
巡檢各一人。○又移江西玉山縣營盤司巡檢。  
駐太平橋。其原轄之二十九都等地方。歸併童  
家坊縣丞管理。設德化縣城子鎮巡檢一人。專  
司鎮務。並管赤南二鄉。及白沙團洲等沿江地  
方。其大姑塘巡檢。仍令專管關口。並沿江一帶  
仁貴鄉逃盜等事。裁河泊所所官一人。改餘干  
縣縣丞。駐瑞洪鎮。兼管鄱湖採草船隻。○五年。  
移江蘇吳江縣縣丞。駐盛澤鎮。○又改直隸永

定道所轄靜海青縣管河兩主簿。隸天津道。○  
又直隸設塔子溝巡檢一人。○又於江南鹽城  
興化二縣之天妃石碓二牘。設牘官一人。興化  
縣之白駒南北中三牘。設牘官一人。鹽城縣之  
上崗北草堰二牘。各設牘官一人。○六年。改廣  
西慶遠府永順土司所轄之白土邱索等二十  
四村。隸宜山縣。設白土巡檢一人。○又廣西設  
遷江縣平陽墟地方巡檢一人。○又議准河南  
許州府舊為直隸州。嗣改為府治。置石梁一縣。  
該處賦無逋負。民亦馴良。復改為直隸州。省石

梁縣。裁知縣典史等官。以原轄之臨潁。郟城。襄城。長葛。四縣隸之。改禹州密縣。新鄭歸開封府管理。並裁硤石驛巡檢一人。以硤石驛驛丞管巡檢事。○七年。四川裁綿竹縣主簿一人。以所管鹽茶事務。歸知縣兼理。改設魏城驛驛丞一人。○又於江西設肇陳口巡檢一人。復設城子鎮太平橋巡檢各一人。○又浙江裁天台縣平頭潭巡檢一人。○又河南裁陽武縣縣丞一人。其所管黃河兩岸隄工。歸併鄭州州判兼管。裁滑縣縣丞一人。其所管衛河。歸併濬縣縣丞兼

管山東裁恩縣主簿一人。其所管運河歸併夏  
津縣縣丞兼管。裁博平縣縣丞一人。其所管運  
河歸併堂邑縣主簿兼管。○又山西裁祁縣盤  
陀驛高平縣長平喬村二驛大同縣聚樂驛崞  
縣原平驛驛丞各一人。以驛務歸各縣管理。移  
五臺縣高洪口巡檢駐臺懷鎮。○又甘肅裁寬  
溝驛驛丞一人。驛務歸皋蘭縣分防縣丞兼管。  
裁白水驛驛丞一人。驛務歸平涼縣兼管。裁鹽  
城驛驛丞一人。改設高臺縣巡檢。即今兼管鹽  
城驛驛務。○又山東裁鉅野縣管糧縣丞一人。

諸城縣南龍灣巡檢一人。掖縣海倉巡檢一人。  
武城縣甲馬營清平縣清陽陽穀縣荊門汶上  
縣開河魚臺縣河橋嶧縣萬家各水驛驛丞一  
人。○又改福建霞浦縣楊家溪巡檢為福鼎縣  
澉城司巡檢。○又廣東裁三水縣西南驛清遠  
縣安遠驛曲江縣芙蓉驛英德縣正陽驛驛丞  
各一人。陽曲縣那龍司澄邁縣新安司巡檢各  
一人。○又直隸裁獲鹿縣縣丞一人。定興縣河  
陽司巡檢獻縣韓村巡檢各一人。○八年福建  
裁古田縣水口驛邵武縣擊口驛甌甯縣葉坊



驛驛丞各一人。移古田縣縣丞駐水口。邵武縣縣丞駐擘口。兼管驛務。既甯縣驛事。歸該縣兼管。○又廣西裁蒼梧縣羅粒司巡檢一人。歸併典史管理。○又廣西裁陽朔縣伏荔市巡檢。改設遷江縣平陽墟理徭巡檢一人。○又安徽裁涇縣主簿一人。蕪湖定遠二縣驛丞各一人。改貴池縣李陽河巡檢。駐該縣殷家匯地方。○又省江蘇福泉縣歸併青浦縣。裁知縣典史等官。○又改直隸永平府屬玉田豐潤二縣。隸遵化直隸州。○九年。湖南裁湘潭縣永甯司巡檢一

人。湘鄉、安化二縣主簿各一人。○又河南裁通許、棗陽、汜水、偃師、西平五縣縣丞各一人。改設永城、夏邑、鹿邑、淮甯、祥符五縣縣丞各一人。○又移甘肅張掖縣縣丞駐東樂堡。○又山西裁平順縣虹梯關巡檢。改設長治縣西火鎮巡檢一人。○十年移直隸蠡縣蓮子口縣丞駐長村。移四川冕甯縣原駐瓦尾縣縣丞駐冕山。○又湖南裁寶慶府屬之邵陽縣縣丞。改設岳州府巴陵縣縣丞一人。佐理糧務。專管隄工水利。○十一年議准直隸永平府屬之七家嶺驛榆關

驛二驛丞均兼管巡檢事。○又山東裁樂陵縣  
縣丞。改設惠民縣縣丞一人。○又江南裁銅山  
縣東岸驛驛丞。改設巡檢一人。歸銅沛豐碭兩  
廳及銅沛兩縣統轄。以河工雜職註冊。○又改  
甘肅三清灣主簿。為西甯縣主簿。駐丹噶爾地  
方。○又移江蘇崇明縣縣丞。駐五滄。移直隸靜  
海縣羣新驛驛丞。駐獨流鎮。○又移江蘇吳縣  
縣丞。駐木瀆鎮。其木瀆鎮巡檢。改駐光福鎮。與  
縣丞分地巡查。○又改直隸慶都縣為望都縣。  
○十二年。省陝西潼關縣。裁知縣。典史。並大慶

關巡檢各官。○又移福建龍溪縣縣丞。駐華封。  
移建安縣縣丞。駐迪口。移建陽縣縣丞。駐麻沙。  
移政和縣赤崖司巡檢。駐下莊。○又江蘇裁青  
浦縣縣丞一人。○又移浙江歸安縣主簿。駐菱  
湖鎮。移象山縣趙畧巡檢。駐三角地方。移定海  
縣沈畧巡檢。駐金塘。移樂清縣縣丞。駐大荆倉。  
○十六年。移江蘇贛榆縣菽水司巡檢。駐青口  
鎮。為青口鎮巡檢。○十七年。湖北裁大冶縣縣  
丞。改設漢陽縣縣丞一人。○又改奉天廣甯縣  
前屯衛巡檢。移紫白旗堡。○十八年。移湖北恩

施縣縣丞。駐木貢村。○又直隸裁滿城縣方順橋巡檢。改設管河縣丞一人。其原設巡檢。改駐三座塔地方。管理土默特兩旗事務。○又議准廣東新甯縣廣海寨巡檢。離大澳二百餘里。於大澳適中之處。那骨堡地方。添設縣丞一人。○又移廣西懷集縣武城鄉巡檢。駐鳳凰觀。移永淳縣武羅鄉巡檢。駐甘棠墟。移南里鄉巡檢。駐小黎墟。移羅城縣莫離鎮巡檢。駐和睦墟。移武緣縣高井寨巡檢。駐羅墟。○又江西裁興安縣縣丞。改設甯都縣縣丞一人。○十九年。江西裁

上猶縣浮龍司巡檢。改設縣丞一人。仍駐營前城。改崇義縣上堡司巡檢。駐金坑。改龍泉縣禾源司巡檢。移紫龍泉。上猶接壤之左安村。○又直隸裁天興牘牘官一人。其現存雲津牘座。就近歸併柳村牘牘官經營。○又議准。廣東新會縣潮連。江門二處。向設潮連巡檢一人。移紫潮連。兼轄江門。嗣改駐江門。距潮連較遠。改設新會縣縣丞。移紫江門。將巡檢仍回駐潮連。○又改廣東東莞縣縣丞。移紫石龍。京山司巡檢。移紫茶山。○又議准。廣東增城縣屬之新塘。與裁

汰之烏石巡檢各地方。相去不遠。添設主簿一人。駐新塘。龍門縣屬之藍汾山廟子角。添設巡檢一人。○又升江西甯都縣為直隸州。裁知縣。縣丞典史各官。改贛州府屬瑞金石城二縣隸之。○又湖北裁黃岡縣屬李埏陽邏二驛驛丞。就近歸團風鎮陽邏鎮各巡檢兼理。於鄖縣之江峪塘鄖西縣之上津堡穀城縣之馬腦觀各設巡檢一人。○又河南裁夏邑縣會亭驛武陟縣甯郭驛滄池縣義昌驛驛丞各一人。驛務歸各縣管理。添設南陽縣賒旗店巡檢一人。○又

省安徽臨淮縣歸併鳳陽縣。裁知縣。縣丞典史各官。添設巡檢一人。分駐臨淮。又設鳳陽縣主簿一人。○又貴州設普安縣新城鎮巡檢一人。○又移安徽霍邱縣開順鎮巡檢。駐葉家集。○二十年。移江蘇元和縣巡檢。駐白直鎮。○又陝西裁鳳縣留壩司巡檢。改設靖邊縣巡檢一人。駐甯條梁地方。○又各省裁汰驛丞。直隸三人。江蘇十七人。安徽二十人。江西一人。浙江九人。福建十五人。湖北四人。湖南六人。山西四人。陝西二人。甘肅二十八人。四川一人。廣東三人。雲



南六人。貴州三人。共裁一百二十二。人將驛站  
錢糧。歸各該州縣管理。○又江蘇裁大使二人。

○二十一年

諭。吏部議覆白鍾山所奏曲阜縣知縣改為題缺一本  
闕里為毓聖之鄉。自唐宋以來。率以聖裔領縣事。夫  
大宗主宅。既已爵列上公。而知縣一官。專以民事為  
職。奉法令。則以裁制傷恩。厚族黨。則以偏私廢事。甚  
至因緣為姦。簞簞不飭者有之。且亦非古人易地而  
官之道。我國家尊崇

先聖。遠邁前朝。延恩後葉。有加無已。豈於此而有靳

馬。但與其循舊制而致廢官。有乖政體。何如通變宜民。俾吏舉其職。民安其治。於邑中黎庶。孔氏族人。均有裨益。著照該部所議行。○又移江西武甯縣縣丞駐木高地方。○又廣東裁茂名縣縣丞。改設海豐縣縣丞一人。分駐汕尾。○又析湖南衡州府城內地置清泉縣。與衡陽縣並為府治。設知縣典史等官。○又浙江裁吳山驛驛丞一人。驛務歸江漲務稅課大使兼理。裁浙江驛驛丞一人。驛務歸城南務稅課大使兼理。○又移江南瓜洲廣惠牘牘官。駐丹徒縣之橫越牘。○又山西

裁臨汾縣縣丞。改設永濟縣縣丞一人。○又移  
浙江白洋司巡檢。駐山陰縣柯橋地方。○又移  
山東滕縣縣丞。駐南三社。○二十二年。省直隸  
蔚縣地歸併蔚州。裁知縣典史等官。○又直隸  
裁天津縣屬西沽巡檢。改設熱河烏蘭哈達巡  
檢一人。○又移四川萬縣市鎮郭里巡檢。駐石  
砬司。○又移江蘇陽湖縣戚墅司巡檢。駐馬蹟  
山。為馬蹟山巡檢。○又移甘肅皋蘭縣寬溝縣  
丞。駐邊要之紅永堡。○二十三年。四川裁宜賓  
縣縣丞。改設屏山縣縣丞一人。駐馬邊營。○又

省直隸魏縣地歸併大名元城二縣。裁知縣典史等官。改魏縣管河縣丞。為大名縣管理漳河縣丞。駐魏縣舊治。○又移江西德化縣城子鎮巡檢。駐小池口。○又議准。湖南巴陵縣縣丞。專管水利。湘陰益陽二縣縣丞。各兼水利銜。○又甘肅設渠甯瓦亭苦水鎮。差大靖等五驛巡檢各一人。兼司驛務。○又議准。福建閩縣莆田甯德。各縣縣丞。均加水利銜。○又議准。山西永濟縣縣丞。兼水利銜。○二十四年議准。浙江永嘉樂清平陽三縣塘埭工程。歸三縣縣丞專管。○

又議准。山東長清縣境內。有齒山。長城二驛。南  
北交衝。裁鄒平縣縣丞。改設長清縣縣丞一人。  
駐二驛適中之張夏鎮。○又移山東安邱縣縣  
丞。駐青萊兩府交界之景芝集。○又移江蘇金  
山縣知縣典史。駐縣境適中之涑涇鎮。改泖橋  
司巡檢。駐金山衛城。移金山縣縣丞。駐寶山所。  
為寶山縣縣丞。移寶山縣巡檢。駐七浦鎮。為七  
浦司巡檢。○又移江西龍泉縣秀洲司巡檢。駐  
分汛之三十三都衙前市。○又移山東黃縣縣  
丞。駐恩縣四女寺。○又改甘肅安西五衛地方。

置安西府。改安西。柳溝二衛。置淵泉縣。為附郭首邑。改靖逆赤金二衛。置玉門縣。改沙州衛。置敦煌縣。各設知縣。典史等官。淵泉縣並設縣丞一人。駐馬蓮井。○二十五年。陝西裁韓城。洋縣二縣縣丞各一人。改設巡檢二人。分駐昌吉羅克倫兩處。○又直隸裁靜青二縣子牙河主簿二人。設天津縣減河主簿一人。改大城縣縣丞。移紮子牙河適中之地。將子牙河東隄工程。統歸管理。○又甘肅裁華亭縣瓦亭驛巡檢一人。○又移浙江青田縣縣丞。駐龍泉縣安仁莊。移

江山縣縣丞。駐二十八都。移廣濟驛驛丞。駐清  
湘。兼巡檢事。移福建浦城縣盆亭司巡檢。駐廟  
灣。○又湖南設湘潭縣黃茅驛巡檢。醴陵縣淶  
口司巡檢。清泉縣新城司巡檢各一人。移湘陰  
縣縣丞。駐林子口。移零陵縣周堂寺縣丞。駐冷  
水市。○二十六年議准。河南郭店元村。博望林  
水。保安五驛。均距縣遙遠。令驛丞兼管巡檢事。  
○又改甘肅大通衛。置大通縣。隸西甯府。設知  
縣。典史等官。○又四川裁黃螂。德昌。迷易。鹽中  
四所。設黃螂所。德昌所。迷易所。巡檢各一人。鹽

中所縣丞一人。○又議准直隸甯河縣蘆台巡檢。附近河干。改為兼河。管理新河。仍兼地方事務。○又移陝西興平縣縣丞。駐店張鎮。○又移江蘇元和縣縣丞。駐白直鎮。兼管崑山。新陽二縣附近該鎮村莊。移白直鎮巡檢。駐周莊鎮。為周莊巡檢。裁崑山縣主簿。改設元和縣主簿一人。專司水利。○又議准江蘇上海縣。原設縣丞主簿典史。均駐縣城。吳淞江巡檢。駐紮法華鎮。分管地方。過於遼闊。將近城之二十五保。歸在城主簿管轄。附近海塘之二十三保。歸本縣管



塘縣丞統轄。○又移江蘇丹徒縣管糧主簿。駐西門外京口驛。移丹陽縣管糧主簿。駐縣城西南珥陵鎮。○又移福建臺灣府鳳山縣萬丹縣丞。駐阿里港。移臺灣縣新港司巡檢。駐郡城。○二十七年。廣東設海陽縣浮陽市豐順縣湯坑市。巡檢各一人。又裁大埔縣烏槎司巡檢一人。○又移山西河曲縣知縣典史。駐離城七十里之河保營。原設巡檢。改駐縣城。○又移江南泚陽縣縣丞。駐錢家集。移宿遷縣縣丞。駐永濟橋。移桃源縣古城巡檢。駐史家集。○又移甘肅涇

泉縣馬蓮井縣丞。駐踏實營堡。改敦煌縣為安西府附郭首邑。○又析湖北沔陽州地。置文泉縣。隸荊州府。裁原駐通判。改設知縣一人。裁鍋鎮巡檢。改設典史一人。○二十八年。移山東益都縣縣丞。駐金嶺鎮。移壽光縣縣丞。駐侯鎮。○又移甘肅張掖縣縣丞。駐東樂。○又省山西清源縣。仍歸併徐溝縣。裁知縣典史等官。○又安徽裁婺源縣大鏞巡檢。改設桐城縣練潭鎮巡檢一人。裁婺源縣太白巡檢。改設懷甯縣三橋鎮巡檢一人。○又甘肅裁瓦亭巡檢一人。○二

十九年議准直隸天津縣西沽疊道就近歸北倉大使管理並兼西沽巡檢銜。○又移山西長治縣縣丞駐距城九十里之西火鎮改原駐該鎮之巡檢回駐虹梯關。又移黎城縣吾兒峪巡檢駐石城里。○又省河南河陰縣歸併滎澤縣裁知縣典史等官。○又議准江西瑞州一府有南北二城文武官員向駐北城今移高安縣縣丞駐紮南城。○又移陝西咸甯縣縣丞駐瀟橋。○又移江西豐城縣柿源司巡檢駐大江口移進賢縣鄔子司巡檢駐梅莊移廬陵縣教城司

巡檢。駐永陽鎮。移井岡司巡檢。駐固江鎮。移樂安縣龍義司巡檢。駐招攜鎮。移崇仁縣周防司巡檢。駐坑埠。移信豐縣新田司巡檢。駐楊溪堡之坡頭墟。移會昌縣湘鄉司巡檢。駐筠門嶺。裁進賢縣潤坡司。泰和縣化石司。長甯縣黃鄉司。巡檢各一人。○又新疆裁清風閣巡檢。改設哈密巡檢一人。○三十年。省湖北文泉縣。仍歸併沔陽州。裁知縣典史等官。仍設巡檢一人。○又直隸裁遷安縣七家嶺驛丞。設建昌營巡檢一人。○又河南裁鞏縣縣丞。改設宜陽縣分防縣

丞一人駐韓城鎮。○又移安徽鳳陽縣縣丞駐  
溪河集。○三十一年移原駐福建金門縣丞駐  
同安縣之灌口。移灌口巡檢駐福鼎縣崇興地  
方。○又福建設甯德縣霍童龍溪縣江東巡檢  
各一人。○又改甘肅平番縣鎮羌巡檢為巴里  
坤巡檢。○又移廣西宣化縣那安寨巡檢駐湖  
潤寨。○又江蘇設清河縣縣丞一人。○又移福  
建晉江縣貼堂縣丞駐石獅街。○又安徽裁廬  
州府照磨改設合肥縣巡檢一人駐梁園。○又  
福建裁松溪縣遂應場巡檢改設建陽縣南槎

村巡檢一人。移崇安縣分水關巡檢。駐五夫村。  
移崇安縣縣丞。駐星村。○三十二年。移湖南永  
明縣杞杞巡檢。駐東安縣石期市。移武陵縣縣  
丞。駐牛鼻灘。裁桃源縣新店驛丞。改設巡檢一  
人。兼管驛務。移安福縣巡檢。駐慈利縣九谿衛。  
移石門縣津石巡檢。駐水南渡。○又移江西弋  
陽縣縣丞。駐西鄉大橋地方。移金谿縣縣丞。駐  
許灣。移宜黃縣止馬司巡檢。駐棠陰。○又移山  
西右玉縣威遠堡巡檢。駐大莊科。其大莊科迪  
東村莊。歸高廟子巡檢管理。大莊科迪西村莊。

歸新設巡檢管理。均隸豐鎮縣。○又山西裁陽  
曲縣天門關巡檢。改設徐溝縣巡檢一人。分駐  
清源舊城。○又移山東陽穀縣縣丞。駐阿城鎮。  
移萊陽縣縣丞。駐姜山集。○又移福建邵武縣  
擊口縣丞。駐禾坪。添設巡檢一人。駐擊口。○又  
移湖北孝感縣馬溪河巡檢。駐楊店。○又浙江  
設樂清縣磐石巡檢一人。○三十三年。移福建  
莆田縣縣丞。駐平海。○又陝西裁扶風縣縣丞。  
改設烏魯木齊特訥格爾縣丞一人。裁特訥格  
爾巡檢。改設迪化城巡檢一人。○又移江蘇宜

興縣縣丞。駐楊港鎮。移江陰縣石頭港巡檢。駐顧山鎮。○三十四年。山東裁鉅野縣安興司巡檢。改設荷澤縣沙土集巡檢一人。○又廣東裁歸善縣欣樂司巡檢。改設香山縣淇澳村巡檢一人。○又移江蘇嘉定縣縣丞。駐南翔鎮。移原設南翔鎮巡檢。駐諸翟鎮。○三十五年。改雲南祿勸彌勒師宗建水四州為縣。以順甯府地置順甯縣為府治。以麗江府地置麗江縣為府治。各設知縣典史等官。○又省四川羅江縣。歸併綿州。裁知縣典史等官。改設驛丞一人。○又移



湖北蘄州茅山橋巡檢。駐彭思橋。○又移安徽  
合肥縣石梁巡檢。駐青陽。設合肥縣官亭巡檢  
一人。移巢縣焦湖巡檢。駐柘皋。為柘皋巡檢。設  
含山縣運漕巡檢一人。○又移浙江嘉善縣縣  
丞。駐斜塘鎮。移永嘉縣縣丞。駐永嘉場。○三十  
六年。升山西霍州為直隸州。改平陽府屬趙城。  
靈石。二縣隸之。又改吉州所屬之鄉甯縣隸平  
陽府。○三十七年。移福建古田縣縣丞。駐水口  
驛。○又山西復設右玉縣威遠堡巡檢一人。○  
又山東設歷城縣公中集泰安縣安駕莊主簿

各一人。裁即墨縣浮山司。夏津縣裴家園巡檢各一人。○三十八年。移安徽貴池縣縣丞。駐碧潭村。○又陝西設長安縣斗門鎮朝邑縣大慶關主簿各一人。○又改江西定南縣置定南廳。裁知縣典史等官。○又改浙江杭州府屬海甯縣為州。裁知縣縣丞典史等官。改湖州府屬安吉州為縣。設知縣縣丞典史等官。○又於甘肅新疆巴里坤地方。置鎮西府。以地置宜禾縣為府治。並置奇臺縣。各設知縣典史等官。○又省甘肅淵泉縣。歸併玉門縣。裁知縣縣丞典史等

官。○又置甘肅昌吉綏來阜康三縣。隸迪化直隸州。各設知縣典史等官。○三十九年。安徽裁廬江縣冷水關巡檢。改設舒城縣曉天鎮巡檢一人。○又江蘇裁淮安府倉大使。改設山陽縣板橋鎮巡檢一人。○又改山東兗州府屬之汶上魚臺嘉祥三縣。隸濟甯直隸州。改東昌府屬之邱縣夏津武城三縣。隸臨清直隸州。○又浙江裁歸安縣縣丞一人。○四十年。甘肅設皋蘭縣主簿一人。管理河橋。設平番縣主簿一人。專司水利。裁哈密酤水巡檢。改設嘉峪關巡檢一

人。○又移浙江西安縣縣丞。駐梓樹潭。移麗水縣縣丞。駐碧湖。○又改湖南清化順林大龍鄭家懷化。便水等驛丞為巡檢。○又於江蘇泰州東臺鎮地置東臺縣。隸揚州府。設知縣。典史等官。並管水利縣丞。西溪司巡檢各一人。○又析江蘇泰州地置東臺縣。該縣丁溪海堰兩廂。向設廂官二人。專司啟閉。裁併一員管理。改設巡檢一人。駐富安場。○四十二年。甘肅設隆德縣。縣丞一人。駐莊浪。○又陝西裁蒲城縣縣丞一人。○又省安徽虹縣。歸併泗州。以其城為泗州。

治。裁知縣等官。○四十三年。升熱河廳為承德府。改喀喇河屯理事通判廳為灤平縣。四旗理事通判廳為豐富縣。塔子溝理事通判廳為建昌縣。烏蘭哈達理事通判廳為赤峯縣。三座塔通判廳為朝陽縣。均以理事通判管知縣事。各設巡檢管典史事。○四十四年。議准。江西崇仁縣有南北二城。知縣縣丞典史各官。向駐北城。今移縣丞駐紮南城。○又江西裁南昌縣三江巡檢。新建縣吳城巡檢。改設主簿各一人。管理各圩隄。兼司水利。○四十五年。改山東濟甯直

隸州屬之汶上縣隸兗州府。兗州府屬之金鄉縣隸濟甯直隸州。○四十七年。升陝西興安直隸州為府。以州地置安康縣為府治。設知縣。典史等官。仍以原轄之平利。洵陽。白河。紫陽。石泉等縣隸之。○四十九年。改河南儀封縣為儀封廳。裁知縣。縣丞等官。○五十二年。四川設太平縣。城口主簿一人。○又江西裁石城縣。赤江司巡檢。復設城子鎮巡檢一人。○又改福建臺灣府諸羅縣為嘉義縣。○又改福建臺灣府鳳山縣城於埤頭街。移下淡水巡檢。駐舊城。移阿

里港縣丞。駐下淡水。設北路斗六門縣丞一人。  
歸嘉義縣轄。移原設巡檢。駐大武壠。○五十四  
年。山東裁淄川縣縣丞。改設禹城縣縣丞一人。  
○又移安徽鳳陽縣主簿。駐蚌埠集。移涇縣縣  
丞。駐查村。○又改福建臺灣縣羅漢門縣丞為  
羅漢門巡檢。改新莊巡檢為新莊縣丞。○五十  
六年。裁湖北江陵縣郝穴鎮。監利縣朱家河巡  
檢。改設主簿各一人。○又四川裁三臺縣屬葫  
蘆溪鹽大使。改設三臺縣分駐葫蘆溪縣丞一  
人。○五十七年。移江蘇銅山縣桃山司巡檢。駐

雙溝鎮。為西界司巡檢。○六十年。移山東蘭山縣縣丞。駐蘭陵鎮。○嘉慶元年。省山西平定州屬之樂平縣。改為樂平鄉。仍隸州治。省朔平府屬之馬邑縣。改為馬邑鄉。各裁知縣等官。○二年。貴州裁貴筑縣縣丞。改設銅仁縣縣丞一人。移正大營巡檢。駐磐石營。裁貴陽府司獄。改設鎮遠縣主簿。駐四十八溪。○三年。改貴州平越縣為興義縣。隸興義府。改捧鮪巡檢。隸興義縣。設善安縣縣丞一人。駐新城。移新城巡檢。駐募役司地方。○四年。改河南修武縣縣丞。為曹單



管河縣丞。○六年。升四川達州直隸州為綏定府。以原隸達州之東鄉。新甯二縣隸之。改太平縣為太平直隸廳。裁知縣。典史。城口主簿各一人。又裁墊江縣縣丞。設東鄉縣主簿。平武縣大印山主簿各一人。改保縣歸併理番同知管理。即以該縣改復羅江縣。○七年。析四川達州地置達縣。隸綏定府。為附郭首邑。設知縣。典史等官。○又改順天宛平縣盧溝橋巡檢。為石景山巡檢。○又江蘇設碭山縣。豐縣管河縣丞各一人。○又移陝西長安縣主簿。駐江口。○十一年。

安徽裁歙縣王千司巡檢。改設霍邱縣三河司  
巡檢一人。又裁建德縣永豐司巡檢。改設鳳臺  
縣閭疇集巡檢一人。○十三年。湖北裁黃州府  
司獄。改設黃岡縣倉子埠巡檢一人。○十四年。  
四川裁峨眉縣主簿一人。○又移山西崑都崙  
巡檢。駐薩拉齊。改為包頭村巡檢。○十五年。廣  
東設遂溪縣楊柑墟縣丞一人。○十六年。福建  
設臺灣府噶瑪蘭通判所屬縣丞一人。隸彰化  
縣。○又移雲南會澤縣典史。駐府城。移則補巡  
檢。駐者海地方。為者海巡檢。○又直隸裁涑水

縣縣丞。改設建昌縣縣丞一人。裁棗強縣縣丞。  
改設赤峯縣縣丞一人。裁赤城縣雲州驛驛丞。  
改設建昌縣巡檢一人。並裁龍門縣長安驛驛  
丞一人。○又江西裁臨川縣清泥司巡檢。改設  
該縣東館司巡檢一人。○又移江蘇阜甯縣縣  
丞。駐中河地方。○十七年。省廣東保昌程鄉二  
縣。裁知縣典史等官。○十九年。河南設內黃縣  
楚旺鎮主簿一人。○二十年。省廣東連山縣。裁  
知縣典史等官。○又改廣西太平府經歷。為賀  
縣縣丞。移紫桂嶺鄉大會墟地方。附近各村莊。

歸該縣丞管轄。○二十四年廣東設豐順縣留  
隍司巡檢移饒平縣黃岡司巡檢駐柘林大埔  
縣大產司巡檢駐白猴。○又移山東汶上縣縣  
丞駐馬邨集。○道光元年改陝西鞏坪縣縣丞  
為略陽縣縣丞。改革陰縣縣丞為盩厔縣丞。  
○又河南設考城縣巡檢一人。○二年改湖南桑  
植縣下崗巡檢為古文坪廳巡檢。○三年甘肅  
裁皋蘭縣河橋主簿一人。○又四川仍復太平  
廳為縣設知縣典史各一人。○四年陝西裁郿  
陽縣縣丞一人。改盩厔縣丞為鎮平縣丞。改鎮

平巡檢為袁家莊巡檢。又改河南蘭陽縣為  
蘭儀縣。五年改直隸長垣縣縣丞駐任邱縣。  
為任邱縣管河縣丞。改青縣流河驛驛丞為遷  
安縣沙河巡檢。改唐縣主簿為文安大城二縣  
管河主簿。十二年改江蘇江都縣芒稻舖舖  
官為海南汛分防巡檢仍歸海阜屬管轄。又  
省直隸新安縣改為鄉裁知縣典史等官。又裁  
武清縣要兒瀆雄縣高陽縣管河縣丞各一人。  
裁武清縣任邱縣管河主簿。正定縣兼河主簿  
各一人。裁故城縣鄭家口行唐縣兩嶺口交河

縣新橋巡檢各一人。○又省河南浙川縣。裁知縣等官。並裁湯陰縣宜溝驛驛丞一人。○又省貴州錦屏縣。改為鄉。裁知縣典史等官。設分防縣丞一人。○又浙江裁象山縣趙畧巡檢。建德縣縣丞各一人。○又福建裁沙縣長汀縣丞。清流縣巡檢各一人。○又江蘇裁儀徵縣清江橋廂官一人。裁華亭縣主簿。金壇縣巡檢。如皋興化。二縣縣丞各一人。○又安徽裁蕪湖縣縣丞一人。○又江西裁武甯新淦德興三縣巡檢各一人。○又湖南裁祁陽縣屬永隆市。東安縣屬

石期市。永明縣屬。桃川市。邵陽縣屬。黑田鋪。黔陽縣屬。安江司。桂陽縣屬。鎮安司。通道縣屬。播陽司。巡檢各一人。○十三年。河南裁榮澤縣北岸主簿一人。汎務歸原武主簿兼理。又裁汲縣縣丞一人。歸併輝縣主簿兼管。○又山東裁堂邑縣永通牘牘官一人。歸通濟橋牘官兼管。○十五年。移廣東欽州那陳司巡檢駐連平州。為上坪巡檢。歸連平州管理。○十七年。議准順天宛平縣龐各莊巡檢。作為兼河員缺。○又順天裁東安縣北隄七工主簿一人。○二十年。省雲

南恩樂縣。裁知縣。典史等官。置邱北縣。設知縣。典史等官。並改師宗縣分防邱北縣丞。為鎮沅直隸廳同知經歷。二十三年。移廣東新安縣官富巡檢。為九龍巡檢。二十四年。移順天寶坻縣主簿。駐永定河北七工。改為東安縣主簿。又移福建浦城縣丞。駐富嶺街。為富嶺縣丞。二十五年。移浙江鄞縣杖錫巡檢。駐鄞江。為鄞江司巡檢。二十七年。改福建嘉義縣斗六門縣丞。歸嘉義彰化。二縣管轄。又改臺灣縣羅漢門巡檢。歸臺灣鳳山。二縣管轄。二十



八年移江西龍南縣大龍保巡檢駐贛縣大湖  
江○二十九年江蘇裁丹陽縣縣丞銅山縣呂  
梁巡檢各一人安徽裁靈璧縣主簿一人○咸  
豐二年江蘇裁鎮洋縣縣丞山陽金壇二縣主  
簿各一人浙江裁山陰縣主簿一人○又裁東  
河乾河各廳員缺惟河南商邱縣縣丞兼司河  
務毋庸裁撤○又湖北裁石首公安蘄水三縣  
縣丞各一人○五年省甘肅宜禾縣裁知縣典  
史等官○八年江南裁碭山縣主簿銅山縣北  
河主簿各一人柘源縣三義鎮巡檢一人○十

年江南裁東臺山陽裏河。桃源阜甯清河裏河。  
外河鹽城阜甯北岸。江都寶應宿遷糧河中河。  
銅山睢甯碭山豐縣安東。盱眙儀徵管河縣丞  
十九人。高良澗。睢甯清河裏河中河。外河。山陽  
外河。高家堰。安東。桃源北岸。南岸。中河。寶應。蕭  
縣。甘泉。銅山南岸。豐縣宿遷北岸。南岸。連河。沛  
縣。阜甯北岸。管河主簿二十一人。阜甯海南山。  
陽童家營宿遷劉馬歸仁。阜甯。洋寨。廟灣。大套  
馬運富安水利。清河馬頭。安東五港。長樂興化  
安豐瓜洲。闕虎店。邳州新安。直河。管河巡檢十

六人。○同治元年。黑龍江設呼蘭屬界巡檢一人。○二年。河南裁蘭儀商邱考城三縣管河主簿各一人。蘭考巡檢一人。虞城縣縣丞。王簿。蘭儀縣縣丞。甯陵縣主簿各一人。○又山東裁曹單所屬縣丞。王簿各一人。○四年。移安徽鳳臺縣知縣。駐下蔡鎮。其向管城內之六坊地段。仍歸壽州管理。○又於安徽雉河集地方。置渦陽縣。設知縣。典史等官。○五年。移浙江臨海縣縣丞。駐北岸花橋。移黃巖縣縣丞。駐烏巖。移甯海縣縣丞。駐亭旁。○又省廣東陽江縣。裁知縣等

官。○七年廣東裁廣海寨主簿一人。改為赤溪  
司獄。○八年移福建臺灣府鳳山縣興隆里巡  
檢駐枋寮。○又改江西上饒縣縣丞為該縣分  
防銅塘縣丞。改廣豐縣縣丞為該縣分防大東  
坑縣丞。○十一年甘肅設安化縣縣丞一人。駐  
董志鎮。○十三年移直隸任邱縣東汎管河縣  
丞駐苟各莊。○光緒元年改河南衛輝府屬之  
考城縣仍隸歸德府。○又於福建臺灣置臺北  
府。以淡水新竹宜蘭三縣隸之。各設知縣典史  
等官。又於臺灣南猴洞地方置恆春縣。隸臺灣

府設知縣典史等官。並改臺灣縣羅漢門巡檢。為彰化縣南投社巡檢。裁彰化縣艋舺縣丞一人。○二年廣西置恩隆縣。設知縣典史等官。隸思恩府。○三年奉天置懷德奉化二縣。各設知縣等官。隸昌圖府。又置安東寬甸二縣。各設知縣等官。隸鳳凰直隸廳。又置通化懷仁二縣。各設知縣等官。隸

興京同知。並設寬甸縣長甸河縣丞。二龍渡巡檢各一人。通化縣柳樹河縣丞。帽兒山巡檢各一人。懷仁縣通溝口四平街巡檢各一人。○五年。

廣西裁恩隆縣。義里。下隆里巡檢二人。移恩隆縣知縣。駐平馬墟。平馬墟縣丞。駐燕岡。○六年。奉天置康平縣。裁康家屯經歷。改設知縣。典史等官。○七年。於吉林阿克敦城地方。置敦化縣。設知縣等官。○又移直隸大名縣。漳河縣丞。駐上游李連莊。○十一年。甘肅新疆置拜城于闐。葉城。疏附。四縣。各設知縣。典史等官。○又移浙江永康縣縣丞。駐八保山地方。改為永仙分防縣丞。○十二年。甘肅新疆置迪化縣。設知縣。典史等官。裁迪化城巡檢一人。○又改浙江龍泉

縣安仁莊縣丞駐青田縣黃壇作為分防縣丞  
○十三年改廣東欽州屬防城司為防城縣設  
知縣等官○十五年吉林設農安縣知縣等官  
○十七年奏准改廣東靈山縣林墟司巡檢為  
欽州林墟司巡檢裁欽州州判改為防城縣縣  
丞裁欽州防城司巡檢改為防城縣典史改欽  
州如昔司巡檢為防城縣如昔司巡檢